

Hipokresia Kristian

Nos tur sa ku krimen ta oumentá, bibamentu a bira masha normal, problemanan familiar ta krese, moralidat ta desparesé, normanan i balornan ta bai pèrdí, èts. Sinembargu ta interesante ku esaki ta sosodé na mesun tempu ku iglesianan ku ta prediká salbashon pa medio di Hesu-Kristo ta oumentá na nos isla.

Nos lo a pensa ku e influensia di tantu kristian lo hasi un impakto positivo riba nos komunidad! Nos lo a pensa ku polis lo tin menos kaso pa atendé, ku prizon lo ta bashi, ku droga kasi lo a pasa pa olvido, ku moralidat lo floresé. Ma klaramente esei no ta e kaso. Dikon tin e kontradikshon aki?

Nos por mostra un dede akusante riba e persona aki, e grupo aya, “pekadónan”, drogadiktonan, hende immoral, èts. Ma nos Dios no ta mas grandi ku nan tur? Mi ta kere firmemente ku **e problema ta sinta serka NOS...e mesun hendenan ku ta bishitá NOS iglesianan...** iglesianan ku ta prediká salbashon pa medio di Hesu-Kristo! Pesei mi ke dirigí mi palabranan pa rumannan di iglesianan ku ta prediká salbashon pa medio di konfia Kristo, esta iglesianan evangéliko i pentekostal.

Un motibu sigur pa dekadensia den nos komunidad apesar di e oumento di iglesianan ta pasobra e supuesto **kreyentenan no ta biba konforme Skritura**. Nan ta bisa ún kos, i ta biba algu totalmente otro. Tantu biaha nos a tendé e mesun storia—ku detayenan diferente: “Un kristian—asta lidernan den iglesia—ta papia masha bunita. Ma for di e mesun boka palabra malu ta skeiru, desonestidat, egoísmo, èts. Ku tur rason, hende pafó di iglesia, mirando NOS hipokresia, ta bisa, “Si esei ta kristianismo, mi ta preferá no ‘aseptá Kristo’!”

Nos ta enkurashá NAN pa aseptá Kristo den nan bida. Ma nan no ta mira Kristo den NOS bida! Hesus a siña stimashon... ma Su supuesto siguidónan ta reflehá interes propio. Nos Señor a prediká konfia Dios...ma kristiannan ta ranka sèn di hende. Kristo a enfatisá integridat...ma NOS ta biba hipokresia!

Ki impakto siguidónan di Kristo por tin riba hende den mundu si nos ta biba, papia, bisti, kanta, anda, i pensa meskos ku hende di mundu? Nos ta bisa, “Kristo por kambia bo bida”, ma nan no ta mira ku Kristo a kambia NOS bida!

Ademas, mi tin pregunta serio di bastante hende den nos iglesianan ku ta yama nan mes “kristian”. **Mi ta duda ku nan a “aseptá Kristo” di bèrdat**. Hesus Su palabranan tokante kristiannan asina tabata skèrpi: “*No ta tur hende ku bisaMi: ‘Señor, Señor,’ lo drenta e reino di shelu; ma esun ku hasi e boluntat di Mi Tata ku ta den shelu. Hopi lo bisaMi den e dia ei: ‘Señor, Señor, nos no a profetisá den Bo nòmber, i den Bo nòmber a saka demoño, i den Bo nòmber a hasi hopi milager?’ E ora ei lo Mi deklará na nan: ‘Nunka Mi no a konosé boso; bai for di Mi, boso ku ta hasi inikidat.’*” (Mateo 7:21-23)

Juan Boutista a reprene hende religioso di su era bisando, “...*duna fruta ku ta kuadra ku repentimentu*” (Mateo 3:8). Den otro palabra, **papia bunita no ta basta; bo bida tambe mester kambia!** Bo por parse un bon kristian, por papia manera un kreyente, por bai su iglesia fiel—asta un iglesia ku ta prediká ku mester “aseptá Kristo”—i tòg bai largu fièrnu ora bo muri... pasobra bo mes nunca a konfia Kristo Hesus so pa salbashon. **Bo por gaña tur hende...asta bo mes. Ma bo no por gaña Dios!** Ku rason Beibel ta konsehá, “*Saminá boso mes pa wak si boso ta den e fe; saminá boso mes!*” (2 Korintionan 13:5).

Sigur sigur Kristo POR kambia bida di hende. Sigur sigur Palabra di Dios tin kontesta pa problemanan na nos isla. Ma hende mester **KE** duna nan bida na Kristo pa E por kambia nan pa medio di Su Palabra. Ma tanten nos boka i bida ta komuniká dos menshe kontradiktório, nos por yena nos isla ku iglesia sin mira kambio...pasobra ningun hende lo KE Kristo!